

## LEZAMATIK

■ Ramon Basaldua

## Gatz bako denboraldia

2000-2001 denboraldia amaitzeko lau partidu geratzen diren arren, dagoeneko balantzeak egiten has daiteke. Izan ere, hemendik Liga bukaera arte gertatzen denak ez luke aldatuko denboraldiaren balantzea.

Luis Fernandez «zoro»-aren etaparen ostean iritsi zen Txetxu Rojo Athleticera, ustez, hamaikako eta joko sistema jakin baten aldeko apustua egitera.

Egia esateko gauzak ez ziren ondo hasi Rojoretzat, hamaikakoan titular izan behar zuten zenbait jokalaririk lesionatu baitzeuden. Carlos Garcia, Bittor Alkiza, Rafa Alkorta, Santi Ezquerro eta beste jokalaririk batzuen falta garrantzitsua izanda ere, ezin da aitzakiatzat hartu. Denboraldi hasieratik Athletic ezinean ibili da. Zuri-gorriak sailkapeneko erdialdean egon dira beti bi partidu ja-



XOUSE SIMAL  
Luis Fernandez eta Carlos Garcia.

rraian irabazi ezinik. Dena den, emaitzak alde batera utzita, Athleticen jokoa makala, eskasa izan da denboraldiko partidu gehienetan. Etxetik kanpo, gainera, taldea negargarri ibili da. Txetxu Rojoren taldeak ez du inoiz sendotasun itxurarik eman eta bere gabezien morroi izan da. Sarritan aipatu izan da Athletic hau nortasun gabeko taldea dela. Luis Fernandezekin, entrenatzaileak ematen zion indarra eta nortasuna. Rojorekin aspaldiko Athletic tristeena ikusi dugu. Begoñakoak alde egingo du Bilbotik ezer erakutsi barik.

**OSASUNA.** Mailari eusteko zazpi puntu behar dituztela dio Lotinak

## Euforiaren ajea

Numanciaren aurkako porrotak aurpegi tristeak utzi ditu Taxoaren



CRISTINA BERRAIN

Javier Miranda eta Miguel Anjel Lotina atzo Taxoaren.

Asier Legarda-ereño | IRUÑEA

Bartzelona, Real Madril eta Mallorcaren aurka jarraian lortutako emaitza onek euforia ekarri zuten Iruñera, baina igandean Sorian jasotako porrota aurpegi tristearen itzulera izan zen. Atzo, Taxoaren etsipena eta kezka ziren nagusi, Numancia bezalako aurkari zuzen baten kontra galtzeaz gain Osasunak itxura kaskarra eman baitzuen Sorian.

Zenbait unetan txantxetarako gogoarekin zegoela agertu izan nahi bazuen ere —jardunaldiko emaitzak aztertzeak eskatutakoan EAEko hauteskunde inguruan hitz egiten hasi zen—, Miguel Anjel Lotina entrenatzailea ere atsekabetuta azaldu zen prentsurrekoan. Lotinaren esanetan «Soriar hiru puntuak lortzea erabakigarria izan zitekeen, eta aldiz galdu ostean garbi dago beste aka-

## MIGUEL ANJEL LOTINA

Osasunako entrenatzailea

«Lehen zatian hiruzpalau aldaketa egingo nituzke, oso gaizki aritu ginen, eta orain ezin dugu huts egin»

«Etxeko bi partiduak irabazteaz gain, etxetik at berdinketa bat lortu beharrean gaude»

tsik ezin dugula egin». Entrenatzaile bizkaitarrak bere erantzukizuna onartu zuen, eta kezka azaldu zituen: «Ongi jokatu eta galduz gero beste hausnarketa batzuk egin daitezke, baina Sorian oso gaizki aritu ginen, aspaldian etxetik kanpoko partiduetan ez bezala».

Bere jokalarientzako mezu-

rik ere igorri zuen Lotinak, eta besteak beste «lehen zatian hiruzpalau aldaketa egin behar» zituzkeela esan zuen. Lotinaren ustez, «bigarren zatian gutxienez jokatzeko saiatu ginen, lehen zatia aldiz negargarria izan zen».

## Aurrera begira baikor da Lotina

Honelako porrot baten ostean «taldea minduta ikusi nahi» duela esan zuen Lotinak, baina era berean baikor azaldu zen Osasunaren etorkizuna aztertzerakoan: «Ligan dena erabakitzeko dago oraindik, eta talde handiek ere puntuak behar dituzte euren helburuak lortzeko, Oviedok eta Valladolidek talde handien aurka jokatu behar dute eta guke ez, hori abantaila izan daiteke».

Lotinak garbi du «etxeko bi partiduak irabazteaz gain, etxetik kanpoko bi partiduetan berdinketa bat behar» dutela.

## EGUNKARIA SARRIA

## Amaitu da koska

Amaitu da Javier Morenok bizi izan duen gol koska. Espainiako selekzioarekin lesionatu ostean, bolada bat golik sartu gabe pasa zuen, baina azken bi partiduetan kataluniarrek golak sartu ditu. Sailkapena: 1.- Javier Moreno (Alaves), 21 gol; 2.- Ivan Rosado (Osasuna), 12 gol; 3.- Edgaras Jankauskas (Reala), 10 gol.

## MOTZEAN

## ATHLETIC

## Javier Uriak bere programako arlo soziala azalduko du gaur

Javier Uriak bere programako arlo soziala eta instituzionalari buruzko xehetasunak emango ditu gaur. Taldeko bazkideentzako proiektuak, beste talde batzuekiko harremanak eta beste kontu batzuei buruz mintzatuko da gaur Uria goizean, 11,30ean.

## OSASUNA

## Zazpi jokalaririk falta izan ziren atzoko lan saioan

Atzoko entrenamenduan jokalaririk ugari falta izan ziren Taxoaren. Armentanok Argentinarako bidea hartu behar izan zuen Soriatik, bere aitaginarreba hil delako. Angelek, Angel Luisek, Krutxagak eta Lekunberri klubaren baimena zuten atseden hartzeko, eta Rosadok eta Alexek San Miguel klinikara joan behar izan zuten.

## LESIOAK

**Athletic.** Vales normaltasunez entrenatuko da gaur.

**Osasuna.** Yanguasek, Alexek eta Rosadok kolpeekin amaitu zuten Soriako partidua, baina igandean jokatzeko arazorik ez dute izango.

**Reala.** Jauregi, atzo, gaitzaren ondorioz jokalariekin aritu zen, baina gero utzi egin zuen lan saioa.

## ATHLETIC

## Txetxu Rojok dio presidentetzarako hauteskunde prozesuak eragina duela jokariengan

Ramon Basaldua | BILBO

Txetxu Rojok ez du berba egin gura bere etorkizunari buruz. Athleticen entrenatzaileak talde zuri-gorriarekin duen kontratua datorren urteko ekainean bukatzen bada ere, dagoeneko ziurtatzen jo daiteke Rojok ez dela jarraituko Bilbon presidentetzarako hautagai biek beste entrenatzaile bat ekartzeko asmoa dute-eta. Rojok, oster, ez du gai horri buruz berba egin nahi. «Ez dut gai hori ukitu nahi. Zenbaitzuk egunero ari dira hizketan hauteskunde buruz ni ere horretan hasteko» adierazi zuen Rojok atzo.

Begoñako entrenatzailearen aburuz azken asteetan ekipoak galdu egin du denboraldian zehar erakutsi duen «erregulartasuna». Txetxu Rojok uste du Athleticen presidentetzarako hauteskunde kanpaina eragina izaten ari dela jokariengan. Alde horretatik dei egin die jokalariei hauteskunde kontuak alde batera utzi eta euren lanean buru-belarri jardun daitezen.

Athleticen jokalariek ez dute atseden egunik izango aste honetan, bariatuan Valentziaren aurka jokatu duen delako. Rojok gogoratu du oraindik Athletic ez dagoela matematikoki salbatuta. «Oraindik ez dago ezer erabakita eta kontrakoa badirudi ere asko duzu jokoa partidu guztietan. Duela jardunaldi batzuk Real Madrilek Liga irabazita zuela zirudien arren oraindik ez du irabazi» gogoratu zuen Txetxu Rojok.

Valentziaren aurkako partiduari dagokionez, Athleticen entrenatzaileak ez du uste Hector Cuperren taldeak burua Txapeldunen Ligako finalean izango duenik. «Valentzia Txapeldunen Ligarako sailkatzeko borrokan ari da eta asko du joan. Partidu gogorra izango da zalantzarik gabe».